

《重修天后古廟碑》 油蔴地天后廟

重修天后元君古廟碑文

沐 恩信士曾瓊林薰手敬撰

匹婦而受百王封，一民而為天下母，是皆有以參贊天地之化，黼黻皇朝之勳。其生也有自來，其逝也有所為。恭維 天后元君，系出林氏，拔萃莆田。少則為窈窕淑女，既貞靜而幽閒，長更能羽化登仙，乃慈悲而普濟。振古如茲，其聲名洋溢乎中國者，亦施及蠻貊也。所以匪特國朝歷崇廟祀，即天下之士庶，亦莫不家尸而戶祝。此蔴地之有廟所由來焉。然蔴地當播越之初，為草創之始，人心渙而未萃，寢廟建而未宏。上棟下宇，以避風雨已矣。況夫世遠年湮，風雨剝蝕，海瘴潮濕，棟榱折崩。覩此形模，凡致其禋祀者，俱皆扼腕。爰乃集議同人，募捐興築。業幸樂善之士，同志斷金，不顧七青八黃，只樂拮据播□(左金右兩)。因是蠲吉鳩工，而築之登登，削屢憑憑。不越月，百堵皆興，而鼙鼓弗勝也。迄今孔曼且碩，呈翬飛鳥革之觀，既實而枚，極竹苞松茂之固。元君之靈爽，不於是而式憑哉。周書有云：皇天無親，克敬惟親。又曰：鬼神無常享，享於克誠。彼凡百君子輸誠樂助，以竣斯舉。如此而天有不錫爾純嘏，元君必降之福也耶。謹備勒其樂助芳名於左：

同治庚午歲(1875)季冬月吉旦重修 天后廟。坐寅向申，由兼甲庚三分分金。

(下略)